

Месяца августа в 5-й день
и месяца мая в 23-й день
Новомучениц Евдокии, Дарии, Дарии и Марии Пузовских
На малей вечерни

На Господи, воззвах: стихиры, глас 1:

Дивен Бог во святых Своих,/ в родех христианских чудодействуяй/ и новыя избранники Своя являяй./ Зрим бо угодниц Божиих:/ новомучениц Евдокию, Дарию, иную Дарию и Марию,/ за Христа пострадавших/ и дерзновение к Нему имущих/ испросити душам нашим велию милость.

Венчались есте неувядаемыми венцы/ от руки Вседержителя Бога,/ мученицы всехвальныя,/ злобу врага терпением и молитвою победившия./ Сего ради усердно вас молим:/ помозите нам подвигом добрым подвизатися/ и веру Православную соблюсти.

Живущия по смерти, мученицы прехвальныя,/ посещаете всех, притекающих к мощем вашим,/ от лютых страстей и бед избавляете,/ исцеления же молитвами вашими подаете/ и спасаете от демонскаго нахождения,/ просяще Бога даровати прегрешений прощение/ чтущим святую память вашу.

Агницы словесныя/ лютым мукам преданы, Божественною благодатию укрепистесь;/ темже, мучителей прещения мужественне посрамивша,/ в Чертог Жениха Христа внидосте, всеславныя.

Слава, глас 6:

Днесь наста велие торжество/ в земли Нижегородстей/ и во всей Церкви Русстей,/ прославляются бо мученицы добропобедныя,/ житием чистым Богу угодившия./ Ныне же, Христу предстояща,/ молятся о нас прилежно,/ любовию совершающих светлое их торжество.

И ныне, предпразднства, или Богородичен.

На стиховне стихиры, глас 7:

Лик новособранный:/ добропобедных Евдокию, Дарию, Дарию и Марию,/ мучениц Господних,/ любовию Христовою связуемых,/ песньми восхвалим, мучениколюбцев собрание,/ с верою к ним взывающе:/ от всякия избавите нас беды и нужды,/ всечестныя страдалицы,/ и молитесь о спасении душ наших.

Стих: Дивен Бог во святых Своих,/ Бог Израилев.

Всехвальныя мученицы,/ Церкви новое утверждение,/ верных похвало, безбожных посрамление,/ слова Спасовы делом совершившия/ и многоразличными страданиями Царство Божие восхитившия,/ молитесь о спасении душ наших.

Стих: Святым, иже суть на земли Его,/ удиви Господь вся хотения Своя в них.

Подвигу древних отцев поревновавша/ и преподобным матерем в вере подражавша,/ Христа ради подвизаетесь твердо,/ Иже, укрепи немощное ваше естество/ и обогатив даровании Духа,/ призва к мученическому подвигу/ во спасение душ ваших.

Слава, глас 8:

Всевышний Владыко,/ в Троице славимый и поклоняемый,/ ущедри ны мольбами мучениц,/ обагрении кровными украсившихся,/ пред мучители дерзновенно Тя исповедавших,/ Единого Истинного Бога всех,/ Иже вчера и днесь Тойже, и во веки.

И ныне, предпразднства, или Богородичен.

Тропарь писан на велицей вечерни.

На велицей вечерни

Блажен муж, 1-й антифон.

На Господи, возвах: стихиры на 8, глас 8:

О, преславного чудесе!/ Днесь новомученицы прославляются/ и прелести мрак разгоняется,/ вера христианская возвышается/ и колеблется нечестие,/ радуются вернии и праздник составляют,/ вопиюще Христу Богу:/ мучеников похвала и победа Ты еси, Всесильне.

Велий еси, Господи, и чудна дела Твоя!/ Род верных ныне торжествует:/ новоявленные страстотерпицы Евдокия, Дария, Дария и Мария,/ яже немощными телесы,/ силою же Всемогущаго Бога укрепляеми,/ крепче муки претерпеша./ Темже о них Тебе вопием:/ страдальцев похвала и победа Ты еси, Всесильне.

Глас 6:

От юности заповедем Божиим внимала еси,/ чистоту духовную усердно хранящи,/ и путь юродства избрала еси, блаженная мати Евдокие,/ в годину же лютую, яко наставница мудрая, многия души к Богу обратила еси./ Ныне, на Небесех в радости непрестанной пребываючи,/ воспеваеши воскресшаго Христа.

Прославим днесь другинь верных,/ приснопамятную Дарию,/ велию подвижницу, духом ко Господу пламеневшую,/ и другую Дарию,/ молитву Иисусову непрестанно творившую/ и псалмы по вся дни воспевавшую,/ и Марию смиренную,/ смерть безстрашно приемшую./ Сия четыре, женским немощным естеством/ полки демонския мужески на земли победивша,/ точат исцелений струи/ и укрепляют сердца верных.

Слава, глас 5:

Все мирское отложивша пристрастие,/ благую же часть избравша,/ матери наша Евдокие, Дарие, Дарие и Марие,/ в воздержании и молитвах,/ бдении и пощении усердно подвизались есте/ и сосуди чистии Святаго Духа явились есте./ Темже, неизреченных чудес дар от Бога приемша,/ молитесь неослабно ко Господу/ мир даровати земли Русстей/ и душам нашим велию милость.

И ныне, предпразднства, или Догматик.

Вход. Прокимен дне. И чтения три преподобномуческая.

На литии стихира храма и святых, глас 6:

Все отложивша житейское томление/ и сладость текущую презревша,/ Крест взяли, яко иго Божественное,/ и Христу последовали,/ и к Небесному покою чудно вселистеся./ О, подвижницы и страдалницы блаженные,/ за Христа тридневная избиения и смерть претерпевшия,/ приидите посреде нас невидимо,/ предначинающа торжество и пение,/ и сподобляюща даров невещественных/ ваш праздник совершающих светолепно.

Слава: глас 4.

Кто изглаголет подвиги и страдания ваша,/ матери блаженныя Евдокие, Дарие, Дарие и Марие;/ кто по достоянию восхвалит постничество ваше и скудное житие:/ молитвы непрестанныя и удручение тела,/ страстем противление и всенощное стояние,/ имиже себе ко исповеданию веры Христовыя предуготовили есте./ Сего ради венцы победныя от Спаса восприемша,/ молитесь прилежно/ о верою чтущих святую память вашу.

И ныне, предпраздства, или Богородичен.

На стиховне стихиры, глас 4:

Днесь, вернии, стецытесь/ и общее торжество составите:/ новыя бо явишася мученицы,/ дщери преподобнаго Серафима нареченныя,/ обитель Дивеевскую и доныне незримо посещающия/ и молящияся о спасении душ наших.

Стих: Дивен Бог во святых Своих,/ Бог Израилев.

Веры Православныя истинныя хранительницы/ и устава церковнаго усердныя блюстительницы,/ велий глад послушания ради терпящя,/ в телесех ваших Христа прославили есте,/ мученицы Евдокие, Дарие, Дарие и Марие,/ жестоко бо мучители уды ваша сокрушиша,/ вы же избиения доблественно претерпевша,/ Бога даже до смерти исповедали есте./ Того молитесь о спасении душ наших.

Стих: В церквах благословите Бога,/ Господа от источник Израилевых.

С пострадавшими Христа ради,/ на Небесех предстоящи,/ мученице Евдокие славная,/ в сонном видении скорбящей девице глаголала еси:/ плач свой преложи на радость,/ молитву Иисусову в молчании твори непрестанно,/ аз бо посреде Иерусалима Горняго/ молюся о спасении душ ваших.

Слава, глас 1:

Живуща по смерти, прехвальныя,/ посещаете вся, притекающи к мощем вашим,/ и от лютых страстей всегда покрываете,/ и от бед избавляете,/ источаете же исцеления/ и спасаете от демонскаго нахождения,/ просящя Бога даровати прегрешений прощение/ чтущим святую память вашу.

И ныне, предпраздства, или Богородичен.

Тропарь, глас 4:

Царствия ради Небеснаго/ мир и вся яже в мире оставили есте,/ тесноту совершеннаго послушания возлюбивша,/ дивныя подвижницы и Христа ради мученицы/ в годину лютых испытаний в земли Нижегородстей процветшия,/ блаженныя матери наша Евдокие, Дарие, Дарие и Марие,/ молитесь о спасении душ наших.

На утрени

По 1-ом стихословии седален, глас 4:

От младенства Христу себе обручивши, мученице Евдокие,/ постом, бдением и непрестанною молитвою/ дар прозрения и рассуждения духовнаго стяжала еси,/ темже и по кончине твоей помощь и утешение подаеши/ всем, чтущим честная страдания твоя.

Слава, и ныне, предпразднства или Богородичен, глас тойже:

Благодарственно воспевати от сердца/ и прилежно просити Твоя милости, Владычице,/ раби Твои собращася, зовуще и глаголюще:/ Пресвятая Дево,/ предвари и избави нас от враг видимых и невидимых и всякаго прещения,/ Ты бо еси наше заступление.

По 2-ом стихословии седален, глас 4:

Подвигом жития своего мученицы Евдокия, Дария, Дария и Мария,/ на лютую смерть себе предуготовиша/ и, тридневная избиения Христа ради претерпевша,/ на погосте убиены быша./ На месте же их погребения многая знамения явишася,/ да утвердятся сердца в вере Православней.

Слава, и ныне, предпразднства или Богородичен, глас тойже:

Приидите, людие,/ ублажим Заступницу Усердную рода христианскаго,/ се бо предстоит Престолу Царя Славы/ и со слезами молит о земнем уделе Своем./ С Неюже вкупе и собори святых новомученников вопиют немолчно:/ Владыко Христе, спаси землю Русскую.

Величание:

Величаем вас,/ святые мученицы Евдокие, Дарие, Дарие и Марие/ и чтим честная страдания ваша,/ яже за Христа претерпели есте.

Псалом избранный: Бог нам прибежище и сила.

По полиелеи седален, глас 8:

Удивишася мужеству вашему, страдалицы,/ лица ангельстии и православных собори:/ како в телеси немощнем женстем страждущия,/ безплотныя враги силою Духа победисте?/ Темже благодарственно о вас воспевают вси Пресвятую Троицу,/ явившую в последняя лета мученицы, древним равночестныя.

Слава, и ныне, Богородичен:

Живущим, Госпоже, рабом Твоим в земной юдоли сей буди Утешительница,/ отходящим от мира сего – Покровительница/ и стоящим на Судище страшнем Заступница явися,/ избавляющи осуждения Твоим всемошным предстательством.

Степенна, 1-й антифон 4-го гласа. Прокимен, глас 4: Дивен Бог во святых Своих,/ Бог Израилев. Стих: В церквах благословите Бога, Господа от источник Израилевых. Всякое дыхание: Евангелие от Марка, зачало 21.

По 50-м псалме стихира, глас 6:

Днесь память мучениц/ Евдокии, Дарии, инья Дарии и Марии совершающе,/ достойно сих да ублажим./ Тыя бо воистину, обнищавша духом, обогатилася,/ кротцы бывша, землю кротких наследоваша,/ плакавша, утешилася,/ алкавша правды, насытилася,/ миловавша, помиловани быша,/ чисти бывша сердцем, Бога, якоже мощно, узреша,/ миротворивша, Божественнаго сподобилася сыноположения,/ гонимы же и мучимы правды ради,/ на Небесех ныне веселятся и радуются,/ и прилежно молятся Господеви,/ помиловатися душам нашим.

Канон, глас 8.

Песнь 1

Ирмос: Колесницегонителя фараоня погрузи/ чудотворишь иногда/ Моисейский жезл, крестообразно поразив/ и разделив море,/ Израиля же беглеца, пешеходца спасе,/ песнь Богови воспевающа.

Духовный лик составльше, вернии,/ славныя страсотерпицы, яко светильники Церкви, озаряющие сердца, песнями почтим,/ верою и любовию память их совершающе.

Восхвалим днесь четверицу славную:/ блаженную Евдокию, Дарию, иную Дарию и Марию,/ подобниц древним мучеником подвиги и страдании.

В лета, в ня же огонь любве ко Христу угасл есть,/ явистесь, мученицы доблия./ Молитесь, да огонь Божественныя любве/ согреет охлаждающая сердца наша.

Богородичен: Пресвятая Богородице Дево,/ Ты, дары духовными от Пресвятыя Троицы паче всех человек преисполнена еси;/ темже, благодатию Твоею укрепляеми,/ умиленным сердцем милости Твоя прославляем.

Песнь 3

Ирмос: Небеснаго круга, Верхотворче, Господи,/ и Церкви Зиждителю,/ Ты мене утверди в любви Твоей,/ желаний краю, верных утверждение,/ Едине Человеколюбче.

Дивна есть, Христе, держава крепости Твоя!/ Се бо нынешний немощствуяй род Крестом Твоим вооружися/ и силою Твоею сильнаго злобою древняго врага победы.

Воспоим вси Евдокию верную,/ от младенства крест взявшую, подвиг юродства подъемшую, мудрость же духовную стяжавшую/ и путем ангельскаго жития Единому Жениху Небесному уневестившуюся.

Кротки и незлобивы бывша во всем житии вашем,/ послушанию вольно навыкли есте, мученицы Дарие, иная Дарие и Марие,/ сего ради на Небесех обрели есте покой./ Молите Бога о душах наших.

Богородичен: Жизнь рождшая, Дево Всенепорочная,/ сердца моего струпы исцели,/ ходатайствы Твоими, еже к Сыну Твоему, Богоблаженная.

Кондак и икос предпразднства.

Седален, святым, глас 8:

От трудов земных и страданий многовидных/ крылами веры во обители Небесныя возлетели есте, матери богоблаженныя,/ идеже Престолу Вседержителя предстоите./ Того о нас молитесь/ прегрешений оставление даровати и душам нашим велию милость.

Слава, и ныне, предпразднства или Богородичен, глас тойже:

Милосердия сущи источник,/ не лиши нас милости Твоя, Богородице,/ но с мученицами, в земли нашей просиявшими, Господа моли/ свободити нас от работы вражия/ и утвердити во благочестии и чистоте.

Песнь 4

Ирмос: Ты моя крепость, Господи,/ Ты моя и сила,/ Ты мой Бог, Ты мое радование,/ не оставь недра Отча/ и нашу нищету посетив./ Тем с пророком Аввакумом зову Ти:/ силе Твоей слава, Человеколюбче.

Во дни и нощи молитвы творяща,/ ни сна очесем, ни веждама своима дремания не давали есте отнюд,/ хлад и глад вольно претерпевающа, мученицы славныя./ Научите нас молиться прилежно.

Радующаяся, терпели есте клеветы и поношения от человек/ и различная стреляния вражия Христа ради Жениха Своего,/ да любви Божия в мире сем грешнем возсияет.

Помысливши немощную Евдокию оставити,/ девица юная в сонном видении сподобися зрети преподобнаго Серафима,/ иже Евдокию и служащих ей нарече дщерьми своими.

Богородичен: Иконою Иверскою не точию Афон просвещается,/ но и инии гради и веси освящаются/ и, чудесную помощь приемлюще,/ источник утешения в ней обретают и вопиют:/ радуйся, Благая Вратарнице, двери райския верным отверзающая.

Песнь 5

Ирмос: Вскую мя отринул еси/ от лица Твоего, Свете Незаходимый,/ и покрыла мя есть чуждая тьма, окаяннаго,/ но обрати мя и к свету заповедей Твоих/ пути моя направи, молюся.

Мученице Евдокие преславная,/ до ныне просвещаеши души человеческия Светом благодати, тебе данная,/ темже и нас, любовию совершающих всепразднственную память твою,/ от бед и напастей избави.

Жениха временнаго не восхотевши зрети, мученице Дарие,/ избиение от сродник претерпела еси/ и даже до смерти Единому Господу дух горящий возносила еси.

В сердце своем храмину благоуханну сотвориши,/ и ты, мученице Дарие,/ образ истиннаго смирения и совершеннаго терпения нам явила еси.

Святитель Николай трикраты явися ти, мученице Марие славная,/ на подвиг странничества первее благословляя,/ послежде блаженней Евдокии послужити повелевая.

Богородичен: Радуйся, Приснодево, золотая кадильнице,/ в нейже вложися Небесный фимиам — Христос,/ облагоухай притекающих к Тебе, Богородице.

Песнь 6

Ирмос: Молитву пролию ко Господу/ и Тому возведу печали моя,/ яко зол душа моя исполнися/ и живот мой аду приближися,/ и молюся, яко Иона:/ от тли, Боже, возведи мя.

Четверочисленный стратотерпиц лик/ нам возсия от земли Нижегородския,/ яко звезды на тверди церковней,/ верныя просвещаяй и прелести тьму разгоняяй.

Болезней неизцельных терпением твердым/ первее победила еси страстей восстания,/ последи, пострадавши крепчайше,/ низложила еси злочестивых державу, Евдокие мученице.

Да восхвалятся ныне с Евдокиєю Дария, иная Дария и Мария славныя,/ послушанием и терпением твердым просиявша,/ Христова винограда розги доброплодные.

Богородичен: Помощницу сильну ведуще Тя, Всеблагая,/ моление Тебе приносим от всея души:/ вонми и услыши ны, Владычице,/ и избави всякаго гнева и прещения Божия рабы Твоя.

Кондак, глас 6:

Житием праведным/ к достойному приятию мученичества себе уготовиша,/ тридневная избиения и смерть претерпели есте,/ невесты Христовы предивныя,/ блаженныя Евдокие, Дарие, иная Дарие и Марие./ Ныне, многими чудесы и исцелении просиявша,/ молитесь прилежно,/ да спасет Господь души наша.

Икос:

Приидите, монашествующих сословие,/ приидите, веры Православныя рачителие,/ приидите, празднлюбцы, всяк возраст,/ песнями духовными похвалим молитвенницы наша:/ постников похвалу, печальных утешение,/ недугующих посещение/ и сущим в бедах скорое вспоможение,/ точащих всем исцеления обильно/ и всякое прошение исполняющих./ Имже верно возопием:/ молитесь прилежно,/ да спасет Господь души наша.

Песнь 7

Ирмос: *От Иудеи дошедше, отроцы/ в Вавилоне иногда/ верую Троическою пламень пещный попраша, поюще:/ отцев Боже, благословен еси.*

Воистину побежден бысть вами враг,/ землю и море хваляйся низпровергнути,/ твердейшим адаманта терпением попрасте того,/ Христа в себе имуща, непобедимыя,/ Егоже воспевали есте:/ отцев Боже, благословен еси.

Беззакония лютая творяще,/ подвижниц Христовых безбожницы тщахуся убити,/ иконы же святые ногами попираху,/ обаче от Иверския иконы Божия Матере свет возсия неизреченный всем верным, поющим:/ отцев Боже, благословен еси.

Тридневная избиения, поругания, и злохуления/ претерпели есте мужественне, страстотерпицы,/ сими бо, яко злато, искуси вас Господь/ и, яко всесожжение тучно, прият./ Емуже и воспевали есте:/ отцев Боже, благословен еси.

Богородичен: Бога Отца Дщерь явилася еси, Марие,/ Сына же Матерь, Приснодево,/ Невеста же Духа Святаго, Пречистая,/ селение Светоначальныя Троицы,/ всего Божества храм одушевлен.

Песнь 8

Ирмос: *Седмерицею пещь/ халдейский мучитель/ Богочестивым неистовно разжже,/ силою же лучшею спасены, сия видево,/ Творцу и Избавителю вопияше:/ отроцы, благословите,/ священницы, воспойте,/ людие, превозносите во вся веки.*

Согласно, вернии, мучениц Марию, Дарию, иную Дарию с блаженною Евдокиєю воспойм,/ яко низложительниц врага и невест Христовых, поющих:/ вся дела Господня, Господа, пойте и превозносите во вся веки.

Святые Тайны Христовы в день кончины сподобилися есте прияти от руку иерея Василия/ и тако, от Господа укрепляемы, мужески на смерть потекли есте поюще:/ вся дела Господня, Господа, пойте и превозносите во вся веки.

Свыше назирающа на совершающих память вашу, венценощицы славныя,/ ходатайствуйте у Всевышняго Дароподателя/ временная и вечная благая нам, зовущим:/ вся дела Господня, Господа, пойте и превозносите во вся веки.

Богородичен: Яже Едина Невместимаго приемши/ и рождши Бога Слова воплощена,/ моли спастися душам нашим.

Песнь 9

Ирмос: Ужасеся о сем Небо,/ и земли удивишася концы,/ яко Бог явися человеком плотски/ и чрево Твое бысть пространнейшее Небес./ Тем Тя, Богородицу,/ Ангелов и человек чиновачалия величают.

Влекомы на заколение, мучителей вопрошаху страсотерпицы:/ Христа исповедахом Бога и тем лжу вашу обличихом,/ за кое беззаконие без суда хотите нас убить?/ Обаче ныне славнии мученицы во славе небесней сияют.

Днесь земля Нижегородская вашу память празднует:/ вы бо явистесь столпи и Божественная забрала, и утверждение,/ молитвенницы и заступницы наша, Богоблаженныя.

Триипостасный Боже наш,/ новых мучениц Твоих приемый подвиги и преславно увенчавый их,/ тех предстательством спаси рабы Твоя/ и сподоби ны вечно Твою Державу славити.

Богородичен: Приведи, Дево, к Сыну Твоему новых мучениц лик четверочисленный/ и с ними помолися,/ яко да, несветимаго огня избавльшеся,/ сподобимся Царствия Небеснаго.

Светилен:

Приими, Господи, новыя мученицы,/ Евдокию блаженную, Дарию, иную Дарию и Марию,/ яко жертву совершенную, яко благовонный фимиам, яко миро многоценное,/ освящающее и просвещающее души наша.

Слава, и ныне, предпразднства, или Богородичен:

Воспоим днесь хвалы Пресвятей Марии Деве,/ плоть взаимоотновавшей Единому от Святыя Троицы, от Нея человеком рождшемуся./ Сего ради величаем Ю, яко Матерь Света и Богородицу.

На хвалитех стихиры, глас 6:

Приидите, мучениколюбцы вси,/ воспоем новомучениц Христовых,/ Евдокию, Дарию, иную Дарию и Марию,/ сия бо явишася в последняя времена,/ слава и похвала Церкви Русския,/ теплыя предстательницы наша,/ немощствующих врачеве изрядныя,/ скорбящих утешение,/ яже молятся, о еже спастися нам.

Приидите, безплотных лица,/ во плоти сущим, спразднуйте нам/ в честней памяти страсотерпиц:/ сия бо, тела носяща,/ яко безплотныя, Христа ради подвизашася/ и лютых мук не убояшася./ С нимиже молитесь,/ о еже спастися нам.

Приидите, верных множества,/ восхвалим новыя мученицы и агницы словесныя,/ яже от богоборных властей мужески муки претерпевша,/ теплыя молитвенницы пред Господем явишася./ Ныне нас подвизают к славе и хвалению Бога,/ укрепльшаго их немощное естество/ и обогатившаго даровании Духа,/ во спасение душ наших.

Слава, глас 8:

Радуйся, преславная Нижегородская земле,/ ликуй, о Бозе торжествующи,/ тебе бо дадеся многоценное сокровище,/ лик четверочисленный новомучениц, обогативших тя:/ Евдокии, Дарии, иныя Дарии и Марии,/ яже, предстояща Престолу Владычню,/ молятся даровати миру мир/ и душам нашим велию милость.

И ныне, предпраздства, или Богородичен:

Владычице, прими молитвы раб Твоих/ и избави нас/ от всякия скорби и печали.

На Литургии

Блаженны от канона предпраздства песнь 3-я и святых песнь 6-я. Прокимен, глас 4: Дивен Бог во святых Своих,/ Бог Израилев. Стих: В церквах благословите Бога, Господа от источник Израилевых. Апостол к Коринфяном, зачало 181. Аллилуиа, глас 4: Терпя потерпех Господа и внят ми/ и услыша молитву мою. Евангелие от Марка, зачало 21. Причастен: Радуйтесь праведнии о Господе:

Молитва

О, дивныя подвижницы и заступницы наша, мученицы Евдокие, Дарие, Дарие и Марие, древних мученик подражательницы истинныя, в тесноте послушания без разсуждения, бдениих многотрудных и посте изнурительнем пожившия! Ныне к вам прибегаем и, к мощем вашим припадающе, молимся: о, страстотерпицы святыя, незлобивыя агницы, своею кровию Христа ради обогранныя и жестокими предатели веры тридневно мучимыя и закланныя! О, прозорливицы, многия души от погибели вечныя исхитившия и о страданиях прежде кончины от Господа извещенныя! О, целительницы и чудотворицы не токмо в земли Нижегородстей, но и по всей земли Русстей прославляемыя! Не оставите нас во гресех и беззакониих погибнути, но помозите в покаянии истинном житие наше скончати и достойными явитися славити Святую Троицу, Отца и Сына и Святаго Духа, во веки веков. Аминь.